

宸

垣

識

略

宸垣識畧卷九

仁和吳長元太初氏輯

外城東

長元按外城敘次二書雖屬明晰然正陽門外竟接天壇與三里河橋則疎脫太甚觀者茫然莫辨今不分五城以猪市大街劃分四段其前門市廛坊曲畧述大概又採錄省郡會館之著者以便公車戾止則是書簡明之意也附繪圖于簡端正陽外門設而不開惟

大駕由之月城東西設二洞子門爲官民出入

觀音大士廟在月城內之東邊有明萬歷壬辰修築都

城碑記兵部職方司郎中虞淳熙撰又本朝刑部

尚書張照碑

關帝廟在月城內之西邊有明萬歷間焦竑碑記董其

昌書

龍王堂在東洞子門外東城根又名朝陽閣明建本

朝乾隆間重修每歲僧人募緣捨粥自十月十五日

起至來春二月十五日止

東月牆在東洞子門外至正陽橋形如扇面列肆居之  
其傍城夾道曰荷包棚

正陽橋在正陽門外跨城河爲石梁三其南綽楔五楹  
甚壯麗金書正陽橋清漢字

大街石道之旁搭蓋棚房爲肆其來久矣今仍之

明崇禎七年純國公朱純臣家燈夕被火于是司城  
欲毀棚房之擁塞衢路者金侍御光辰恐其擾民奏  
請停止

大街東邊市房後有裡街曰肉市曰布市曰瓜子店迤

南至猪市口其橫胡同曰打磨廠內稍北爲東河沿  
曰鮮魚口內有南北孝順胡同長巷上下頭條二條  
三條四條胡同曰大蔣家胡同東南斜出三里河大  
街內有小蔣家胡同水窖胡同此皆商賈匠作貨棧  
之地也

查樓在肉市明巨室查氏所建戲樓 本朝爲廣和戲  
園衙口有小木坊舊書查樓二字乾隆庚子燬于火  
今重建書廣和查樓

魏之琇廣和樓觀劇詩春明門外市聲稠十丈輕

塵擾未休雅有閒情徵鞠部好借勝侶上杳樓紅  
裙翠袖江南艷急管哀絲塞北愁消遣韶華如短  
夢夕陽帘影任勾留

蕭公堂在打磨廠明萬歷二年建爲中城南城分界處  
長元按祠內刊洪都鄉祠四字所居皆江西人據  
云蕭公生于唐時不知其名爲臨江郡船長于太  
陽洲得道仙去封順天王感應蕭公蓋鄱陽湖之  
神也 本朝以此祠爲中南二城分界

北營內北東守備署在蕭公堂後東河沿

○金忠潔公鉉故居在打磨廠今無考

南城吏目署在打磨廠新開路口

靈佑宮在打磨廠明嘉靖年建祀許旌陽真人係江西會館有嚴嵩額存後樓上又天啓二年鼎一

關帝廟在打磨廠東口有明萬歷二十八年鼎一

○吉安二忠祠在鮮魚口內手帕胡同明建祀宋文文

山謝疊山兩公今圯廢門額尚存

崇真觀在打磨廠之南巷明司禮監張政捨宅建正統

十四年賜額景泰四年國子監祭酒胡濶碑

關帝廟在高廟胡同有明嘉靖間鼎一

中城吏目署在北蘆草園

吳越王錢鏐祠在蘆草園雍正二年

敕封誠應吳越武肅王其裔孫世章創建

西竺菴在南蘆草園

玉泉菴在南蘆草園西席兒胡同

乾泰寺在永窖胡同康熙三十九年重修有禮部尚書

杜永臻碑

鐵山寺在三里河橋西明正德間僧宗洪號鐵山者募

綠修橋有修撰周敘重修三里河碑

三官廟在三里河橋東羽士居之二槐樹甚古

南泉寺在三里河橋北灣已圮

三里河元時名文明河接通惠河爲漕儲運道今鐵閘

尚存

大通橋去通州四十里形勢高通州五丈置十閘方可行舟三里河在天壇前去通州五十里高通州一丈九尺置二閘便可行舟但一二走沙耳

正陽門外東偏有古三里河一道東有南泉寺西有

玉泉菴至今基下俱有泉脈由三里河繞出慈源寺八里莊五箇花園一帶直抵張家灣烟墩港地勢低下故道俱存冬夏水脈不竭現今天壇北蘆葦園草場九條巷其地下者俱河身也高者卽舊馬頭明白易見不假經畫稍加修治即可復也但附近勢家花園故成化間楊茂雖嘗建議竟沮不行誠按此修濬則公私大船俱可直抵三里河不但便剝船而已

原按張爵紀五城坊巷胡同南城正東坊有西三里河東三里河蘆葦園崇南坊則有南河漕子家

灣遞運所纜竿市又有三轉橋紀家橋板橋雙馬  
莊八里莊十里河皆三里河入張家灣故道今其  
名雖存而深谷爲陵遺蹟漸不可考矣

長元按今草場胡同東有平樂園南官園北官園  
賈家花園等名要皆昔時園亭遺址

關帝廟在薛家灣係舊刹前有坊曰關帝聖境

明教寺在閩王廟前街明成化年建碑磨泐無考

天仙廟在木廠胡同創于明隆慶間羽士居之今爲禪  
院有萬歷二十九年王汝升碑 本朝康熙丁丑僧

事李錄予重修碑

永壽寺在石虎胡同係舊刹有勅賜額

泰山行宮在蒜市口明天順年建有萬歷間太常寺少卿徐富庶吉士姜逢元二碑

中營參將署在崇文門外抽分廠

崇文門稅務署在崇文門外大街

查嗣璣雜詠詩九門征課一門專馬跡車塵互接連內使自收花擔稅朝朝挿鬢掠雙錢

中營東南二守備署在上三條胡同

天仙廟在上三條胡同

崇恩觀在上四條胡同

卧雲菴在上四條胡同

長元按東城寺觀士大夫游歷者鮮故無碑碣

○水木清華亭元侍御史王儼別業在文明門外東南

里許

今崇文門園池構築甲諸邸第許有壬記云北瞻闔

闔五雲杳靄西望舳艤汎汎于烟波浩渺雲樹參差

之間虞道園有詩

○淨度寺在崇文門東南有元中丞張養浩作其子雁

奴壙銘今無考

火神廟在花兒市明隆慶一年建爲神木廠悟元觀下院有萬歷間右通政李琦碑 本朝乾隆四十一年重修有左都御史崔應階碑每月逢四日自廟前至西口開市

東城正指揮署在花兒市

禮拜寺在花兒市

無量菴在中四條胡同

都窪君廟在花兒市明建無碑可考有古柏一本 本朝

康熙間重建有國子監祭酒孫岳翰林院編修馮雲  
駢二碑門外鐵獅子二康熙初年鑄每年八月初一  
初二初三日廟市

崇興寺在花兒市東康熙二十年重建有鐘一

萬福寺在花兒市東瀦營

太平宮俗名蟠桃宮在東便門內大橋南羽士所居係  
明剝有康熙元年工部尚書吳達禮重建後殿碑每  
歲三月初一初二初三日廟市

查昌業上已沿通惠河至太平宮觀廟市詩十丈

紅塵過雨清惠河添漲繞重城瑤池香渺春雲  
闌苑花鮮曉日明正是蘭亭修禊節好看曲水  
人行金梁風景真如畫不枉元官號太平

普陀寺在東便門內大橋北舊有勅建碑今無考

觀音菴在蟠桃宮南舊名雲深處康熙年建室宇精雅  
傳爲宦家別業所改

○崇恩福元寺元至大元年建奉安武宗御容武宗及  
二后爲東西二殿藏玉冊十有二牒玉寶一鉢有姚  
燧撰碑

白雲寺在坑兒胡同

增福寺俗名財神廟在白雲寺後

火神廟在柴市明成化間建有正德七年建昌侯張延

齡碑

東城吏目署在東河漕

○金山寺在崇北坊今無存

天龍寺在下鍋腔胡同係浙金華會館明萬曆中建

本朝康熙二年修有雍正五年碑

臥佛寺在崇興寺東口入山門有圓殿佛立其中後殿

有臥佛長一丈二尺有十三佛環立肩背後寺無碑  
記祇西廊一鐵鐘明正德戊辰年所鑄稱妙音寺  
長元按寺有乾隆丙戌年翰林侍讀學士圖塔布  
碑又張爵五城坊巷志崇南坊有妙音寺今無存  
寺內正德間鐘或是彼處移來未可知也

朱光熊游臥佛寺詩寺門東接禁城陰野水平沙  
古木森留示人間老病死色空真諦悟禪心

爐聖菴在廣渠門內創于明代係山西治行所建祀老  
君有乾隆十一年都御史孫嘉淦二十一年御史戴

章甫二碑其西偏爲潞安會館

隆安寺在花兒市東南明天順間廢刹也萬歷乙酉蜀僧翠林募修結淨土社堂僧徒念佛歲元旦設果餌享佛盤千數名日千盤會寺後一閣崇禎元年僧大爲立

考按隆安寺今存創于明景泰五年寺中有題名碑可考

長元按隆安寺土人相傳唐刹然景泰五年碑外別無可證惟殿前二柏樹大十餘圍殆四五百年

物其爲元刹無疑

孫廷銓春日隆安寺訪山曉上人時自天童應

詔入都詩遠公廬阜期公房時許題詩在上方古  
寺日長鉢鉢靜故山春暖薜蘿香一乘聞法超禪  
果三殿承暉接御牀歸計未成心已滅自持鐘

梵禮空王

三官廟在隆安寺西乾隆年建

廣渠門在外城之東

義學在廣渠門內雍正間韓城寧永祿捐貲創始乾隆

間紳士公輸增益之內分六齋課徒約二百人冬季施粥百日有副憲莊存與閣學朱珪二碑

福寧禪林在興隆街東明天順中建有正德十一年工部都水司主事翁洪碑

安化寺在崇南坊興隆街明釋曇蘊開山正統八年賜額有景泰六年三衢釋大善弘治十六年光祿卿張天駿二碑

隆興菴彌勒菴俱在興隆街室宇完整無碑碣可考

南臺寺在安化寺南康熙年重建有鐘一

育嬰堂在安化寺南夕照寺西 本朝康熙元年建雍正二年

世宗賜功深保赤扁并 御製育嬰堂碑記頒賜帑金千兩令有司擇謹愿者董其事

夕照寺在萬柳堂西北創建年月無考或云燕京八景有金臺夕照此寺之所由名也據趙吉士育嬰堂碑記云夕照寺順治初已圯僅存屋一楹蓋其來久矣雍正間文覺禪師元信嘗退居于此殿宇修潔完整乾隆間地藏殿兩牆左爲王安昆書高松賦右爲陳

壽山畫雙松皆一時名筆

長元按東南寺院多停旅櫬故舊址重新頗爲宏敞夕照南臺是其最著者也

魏之琇過夕照寺詩閒來僧院愛幽清斜日軒窓迥自明鐘磬不聞林鳥寂鮑家詩唱古先生

拈花禪寺卽萬柳堂在廣渠門內東南角爲本朝大學士益都馮溥別業後歸倉場侍郎石文柱康熙四十一年石氏建大悲閣大殿彌勒殿捨僧住持

聖祖御書拈花禪寺額賜僧德元今恭懸大悲閣上

康熙時開博學鴻詞科待詔者嘗雅集于此檢討毛奇齡有萬柳堂賦今基周圍一頃餘內有小土山卽昔時蓮塘花嶼也檢討陳其年有萬柳堂修禊詩序朱彝尊上已萬柳堂讌集和相國馮夫子韻詩不到閒園已隔年綠楊高映女牆邊無妨並馬橫橋渡更許深杯曲水傳徑仄易侵蘋葉小日晴況有杏花妍舞雩幸忝從游列澱池春光過禁烟小徑升堂步屢偕隄沙遙築避風霾歌翻驟雨新荷好地比崇山峻嶺佳露井有華滋藥甲春衣無杼

挂松釵永和會後斯游最禊飲蓬池未許儕

徐乾學萬柳堂陪讌益都公詩絲綸閣外唱形騁  
攜客還爲杜曲遊種樹已成金澗勝鑿池初引玉  
泉流綺堂晴帶千峯秀碧宇雲開萬井秋醉吐車  
茵何足道夕陽洗爵重淹留

杭世駿過拈花寺詩清梵三時響粥魚亂花空發  
老僧居危闌曲處青山露一桁斜陽曬佛書半  
天婀娜綠梯抽拂拂新條亂打頭兩翼畫闌紅不  
斷荻芽茭葉滿春流溪風掠過打魚磯匝地春

陰綠正肥頭白僧伽破禪寂柳花吹點水田衣原

寺卽馮益都萬柳堂

法藏寺在霍家橋俗呼白塔寺蓋彌陀寺也金大定中  
建明景泰間修更曰法藏有祭酒胡濱沙門道孚二  
碑道孚戒壇第一代戒師世稱鵝頭祖師北地多風  
故塔不空無可登陟法藏寺彌陀塔中空可登塔崇  
十丈窓八面窓置一佛凡五十八佛佛設一燈歲上  
元夜僧燃燈遶塔奏樂金光明窓樂作天上矣

明郭正域法藏寺詩古刹城南寺蓮花處處開金

輪平地轉香雨半天來清話逢元度論文有辨才  
真如非幻境雲水兩徘徊

○大悲寺在崇南坊有勅建碑久廢

左安門在外城南之東

太陽宮在法藏寺西 本朝順治初年建奉太陽日君  
羽士居之

長元按殿庭有無字碑二或明舊碑磨去亦不可  
知其創建年月無考

五虎廟在太陽宮後係明舊刹 本朝康熙年重建無

碑可考殿前古松二株濃陰滿院蓋二百餘年物也  
寺僧云昔時五虎廟塑關張趙馬黃西蜀五將得名  
後燬于火關聖加封帝號今前殿祇奉關帝而五虎  
之名仍舊

雲集觀在五虎廟東北 本朝康熙年建亦羽士所居  
後有斗姥閣旁翼二亭修飾甚完整

延慶寺在纜竿市無舊碑可考有康熙十年鼎鑪一  
華嚴寺俗稱槐寺在三轉橋地名魏村社大市莊有遺  
天會五年梵書尊勝陀羅尼石幢仙露寺講經比邱

圓秀開國男任師誨立明正統二年重修

景福寺舊名石佛寺在三轉橋有明正德間費宏陳天祥二碑

關帝廟在蒜市口

清化寺在正東坊三里河陽明宣德壬子奉聖夫人東安里王妙秀命其弟義勇復衛百戶榮以賜金買保安寺基卽疏圃爲寺今存其街卽以寺得名有明宋拯李廷相二碑

明程敏政宿清化寺詩早脫朝簪出帝城喜分禪

榻坐深更顛疑身在山中住追笑詩從馬上成把  
釣未應歸計拙照人偏愛佛燈明枕酣一夜清無  
夢蕉鹿當年亦浪驚

南城正指揮署在清化寺街

明因寺在三里河東故三聖寺也明萬歷初明肅皇太  
后建賜額有李伯時渡海尊者卷不知何年被人賺  
去存者贊本而僧不知也萬歷二十九年紫柏大師  
自五臺來夜夢十六僧請掛瓶鉢亭午有負巨軸售  
者軸凡十六貫休所畫羅漢也師歎異購之各係以

贊傳寺中天啓二年董其昌過此書佛成道記自稱  
香光居士凡十二版蓋宗伯三十年前見紫柏于此  
寺索書成道記尋前諾也今搨石置僧寮左壁

考按今明因寺有十六羅漢畫軸上有明萬歷時  
釋真可贊似是後人偽託非當時真蹟王祖嫡何  
洛文二碑尚可讀董其昌成道記石刻在寺中

姚彬關王廟在慈源寺東數百武相傳卽元崇恩萬壽  
宮殿中塑像甚古俗傳吳將姚彬盜關公馬被獲強  
不屈廟塑縛彬像公戎服作色左顧彬彬反面色不

屈侍將七人怒視彬縛彬者仰公顏色而受命馬回望其色歎沫人曰隋時塑也

考按姚彬關王廟塑姚彬盜馬被縛像如帝京景物畧所云今存趙吉士云殆元時塑也

藥王廟在天壇之北明武清侯李誠銘建左墀碑文恭順侯吳惟英書 本朝康熙間重修有詹事沈荃碑

天慶寺在藥王廟之西原遼之永泰寺金大安中兵毀元至元壬申重建僧舍有雅致亭有李龍眠羅漢十六軸元學士王惲碑云役初作掘地得廢鐘所刻天

慶二字考之蓋有遼建號也卽爲新寺名明天順嘉  
靖重修有蹇英徐階二碑

蹇英重修天慶寺碑畧云距城南三里河之濱曰魏  
村社其地幽曠聞寂林木叢茂有古刹曰天慶其創  
始不可考宣德中僧德誌仍其故址更新之建大殿  
禪堂齋堂丈室以次而成天順戊寅十月或請于朝  
仍賜額曰天慶寺

○圓覺寺在魏村社明景泰中建金井在魏村社

考按圓覺寺在三里河橋東寺已無存今其地猶

仍寺名金井無考

永濟橋在金臺書院東有乾隆四十七年重修碣

金臺書院在慈源寺東本義學康熙四十一年

聖祖御書廣育羣材額以賜乾隆十五年改爲書院有  
御製碑

慈源寺在金魚池之東明成化二年指揮朱善建有太  
常少卿潘宸碑 本朝康熙甲寅重修有致仕大學  
士衛周祚碑

魚藻池俗呼金魚池在三里橋東南天壇之北畜養朱

魚以供市易舊志云金時故有魚藻池池上有殿榜  
以瑤池殿之址今不可尋矣居人界池爲塘植柳覆  
之歲種金魚以爲業池陰一帶園亭甚多南抵天壇  
一望空濶每端午日走馬于此

葉映榴五日集金魚池詩客心爭良辰芳譙卜清  
晝深樹含涼風方塘迴碧溜夏花露蕊鮮蘭根土  
香瘦亂離所見花入眼如故舊回首異河山撫懷  
驚節候茲偕勝侶游盤格忘粗陋藉草傾蒲觴丹  
砂笑勾漏一擲喝卷波十巡誇射覆掬水擾游鱗

腮鬢炫金繡投餌荇藻開徘徊若避就魚知人樂  
無吾從惠莊後談謔清具移酒渴晚汀漱被襟連  
臂歌岸幘綠溪走肴核紛道旁酣呼雜老幼佩管  
游女歸鞍馬如輻輳釵符壓輕蟬朱索牽衫袖歌  
舞喧城隅啁啾和猿狖長安驚繁華荆楚猶戰鬪  
杯酒醉左徒獨醒世所詬慷慨誦離騷誰爲後來  
秀天涯詩酒懷芬芳同蘭臭雙鬢不易青一醉塞  
機竇斜陽樹杪催弦月女墻迢歸鞭指西東蒼然  
滿烟岫

王士禎詩端陽躡柳足歡娛霧縠新裁勝六銖愛  
傍橫塘不歸去拔釵親市七星魚

又冬日過金魚池詩記來劇飲暮春天絡馬青絲  
白玉鞭却倚迴闌望朱箔吳歌趙舞爲君妍 折  
葦荒蒲臨斷岸暮雲寒雪壓重樓獨來不見高陽  
侶斜日烟波迥自愁

○李園明武清侯李偉別業在三里河旁疏水入園有  
金魚池遂以水勝可汎舟中有梅花亭砌亭爲瓶五  
鑽爲門爲窓繪爲壁甃爲池范爲器其形皆以梅又

有漚臺鳧樓船橋魚龍亭諸勝歷一水關長廊數百  
間水岸設村落宛如江浦漁市

明劉同升李園小集詩小橋行過柳溪灣爲訪園  
亭竟日閒出郭已知依緣水登樓更喜見青山寒  
泉落木疑邱壑瘦馬深衣自往還剩采東籬尋舊  
約君應無夢到塵寰

長元按李園已無考今東小市空曠十餘畝有平  
橋渠水傳是故家園地疑即其遺址

海潮寺在金魚池北係舊刹今傾圮

真武廟在金魚池北已圮

普賢禪林在安國寺東頗完整比邱尼居之

安國寺在三里河橋南灣明天順元年建碑廢無考

關帝廟在安國寺西有明隆慶年鼎一

東小市在半壁街南隙地十餘畝每日寅卯二時貨舊物者交易于此惟佔衣最多

南營東南一守備署在三里河橋東小市

慈谿會館在東小市地甚寬敞每逢科場直隸學政錄取遺才于此

精忠廟在東小市西 本朝康熙年建有乾隆戊子大學士劉統勲碑門外鑄秦檜夫婦跪像旁有喜神廟爲梨園子弟公所有乾隆丙申詹事劉躍雲碑

吳巖謁精忠廟詩痛飲黃龍未必酬幽燕遺廟壯

千秋可憐屈膝秦長脚得藉陳王解免不

金陳王元宗故

榆南還  
主和議

紫竹林在精忠廟南俗名担子市

南營守備署在三里河橋大街西

街道廳署在東珠市口大街

中營游擊署在正陽門外猪市口

天壇周十里在正陽門外永定門之東明永樂十八年  
建繚以垣牆周九里十三步今仍之

圓丘又稱天壇形圓象天南嚮三成上成徑九丈高五  
尺七寸二成徑十有五丈高五尺二寸三成徑二十  
一丈高五尺上成石面九重自一九環甃遞加至九  
九二成自九十遞加至百六十有二三成自百七十  
有一遞加至二百四十有三合一三五七九陽數每  
成四出陛皆白石九級上成石闌七十有二三成百

有八三成百八十合三百六十周天之度柱如之內  
壇形圓周百有六丈四尺高五尺九寸壇門四皆六  
柱三門柱及楣闕皆白石扉皆朱櫺壇外東南丙地  
燔柴鑪一高九尺徑七尺甃以綠琉璃瘞坎一東南  
燎鑪四分設于壇東西門之左右壇北門後爲

皇穹宇南嚮環轉八柱圓檐上安金頂基高九尺徑五  
丈九尺九寸石闌四十有九東西南三出陛各十有  
四級左右廡各五間一出陛殿廡覆瓦均青色琉璃  
圍垣形圓周五十六丈六尺八寸高丈有八寸南設

三門崇基石闌前後三出陛各五級外壇東門外東北隅爲 神庫 神厨各五間并亭一祭器庫樂器庫櫻薦庫各三間又東爲宰牲亭并亭各一壇外內垣門四東曰泰元南曰昭亨西曰廣利北曰成貞皆朱扉金釘縱橫各九昭亨門外東西石坊各一

張英長至日 上躬祀 南郊恭紀至日躍南極

初陽紀仲冬繡裳添綵線玉琯應黃鍾慶典同函夏明禋掌秩宗齋宮香霧繞泰畤碧雲封祝版臨深殿 親郊出 九重霜華迎 翠輦燭火照寒

松登降聞

天語堂皇仰

帝容瑤臺

三后配

黼帳百神從  
繭栗燔柴犧星辰  
護燭龍祠官調寶瑟  
舞羽間金鏞  
一德符穹昊  
羣僚秉肅辭  
遙瞻蒼璧薦其睹  
紫烟濃

施閏章陪祀  
郊壇詩圓丘  
清曉露氤氳  
拜舞衣冠鶴鷺分  
碧殿朱旗列宿繞  
黃鐘清磬九霄聞  
雪澄泰時光連海闊  
望天門氣作雲肅穆  
祠官能備物馨香  
還賴聖明君

李之芳陪祀  
郊壇詩太乙瑤壇接露臺  
龍旌遙

拂翠華來仙韶細度雲門奏玉殿初明泰時開  
千尺爐烟天外轉九重蔽佩月中迴祠官解有  
登封意獨向甘泉擁賦才

祈年殿在成貞門北壇圓三成南嚮上成徑二十一丈  
五尺二成徑二十三丈二尺六寸三成徑二十五丈  
面甃金甃圍以石闌四百二十南北三出陛東西一  
出陛上成二成各九級三成十級壇上建殿制圓  
內外柱各十有二中龍井柱四檐三重上安金頂左  
右廡各九間均覆青琉璃前爲祈年門崇基石闌

前後三出陛各十有一級門外東南燔柴爐一瘞坎  
一燎鑪五內壇周百九十丈七尺二寸門四北門後  
爲

皇乾殿五間上覆青琉璃南嚮正面三出陛東西一出  
陛各九級石闌五十有九內壇東門外長廊七十二  
間二十七間至 神厨井亭又四十七間至宰牲亭  
爲祭時進俎豆避雨雪之用壇外圍垣東西北三面  
各有門南接成貞門

徐乾學孟春扈從 祈穀壇詩鑾輿曉出鳳城邊

聖主勤民爲祝年蒼輶初陽方布令瑤臺瑞氣  
早占天風和宛宛聞仙樂日麗遙遙敞 御筵執  
簡小臣隨豹尾欣逢盛事賦甘泉

成貞門外西北爲

齋宮東向正殿五間崇基石闌三出陛陞前左設齋戒  
銅人石亭一右設時碑石亭一後殿五間左右配殿  
各三間內宮牆方百二十三丈九尺九寸中三門左  
右各一門牆外環池前跨石梁三左右各一東北隅  
鐘樓一外宮牆方一百九十八丈二尺環以迴廊一

百六十三間復達以深池宮門石梁均與內同

王士禎天壇齋宿詩穹于中宵啓齋心上日虔星  
河明泰畤燎火動甘泉紫禁傳清漏青松覆御  
烟竹宮空望拜不數漢皇年

廣利門西北爲神樂署東向大門三間中凝禧殿五  
間後顯佑殿七間凡奉祀協律各廡舍均連檐通脊  
分設廊廡中西爲犧牲所大門三間南嚮房九十三  
間中祀 犧牲之神後爲官署東西列屋以飼牲羣  
外垣內西南鐘樓一

馮廷槐春杪集神樂觀送同年之官詩尺五天邊  
春晝晴同遊南陌麴塵生客來彌勒龕中坐詩向  
桃花潭上成文苑千秋應作傳酒徒四海舊知名  
于今卻被閒人笑好事羅郎又送行

圜丘 祈年殿共圍垣六重內垣高丈一尺址厚九尺  
頂厚七尺周千二百八十六丈一尺五寸外垣高丈  
一尺五寸址厚八尺頂厚六尺周千九百八十七丈  
五尺西向門二南北並列南入 圜丘北入 祈年  
殿皆三門角門一

考按朱彝尊原書南城壇兆止載明代而不及金元考元史祭祀志中統十二年于麗正門外東南七里建祭臺設昊天上帝皇地祇位成宗卽位始爲壇于都城南七里則知元之郊壇亦在城南又考析津志郊天臺在京城之南五里卽金大定時拜郊所建然則原書載在郊壇金之拜郊臺者卽是也今附述緣起于此以存金元壇兆舊典而其詳則見于郊壇云

又按明代泰元門內有崇雩壇今則雩祭之禮皆

于 園丘敬謹將事至泰元門迤東今惟建設神  
庫祭器庫及宰牲亭井亭其崇壽壇不復存矣

明黎民表雨後經天壇沙河詩平沙雨濕草茸茸  
白玉高壇紫翠重馬上行人看不厭石廊流水遶

疎鐘

天壇井泉甚甘冽居人取汲焉

王士禎竹枝詞京師土脈少甘泉顧渚春芽枉費  
煎只有天壇石盤好清波一勺買千錢

天壇生龍鬚菜又益母草羽士煉膏以售婦科甚效

永定門在外城之正南


長元按永定門東扇屬南城西扇屬中城以街心  
分界

東城會館之著者東河沿曰奉新浮梁句容打磨廠曰  
粵東臨汾寧浦鮮魚口曰南康孝順胡同曰長沙長  
巷頭條胡同曰武林南昌汀州江右長巷二條胡同  
曰廣豐浦城涇縣長巷三條胡同曰金溪元寧臨江  
南城長巷四條胡同曰岳陽貴池上新德興新城南  
雄樂平休寧高廟胡同曰蕪湖深溝口曰江山高井

胡同曰寧州進賢五河譽慶胡同曰襄陽粵西牆縫  
胡同曰瀘溪草廠頭條胡同曰廣州麻城金箔二條  
胡同曰邵武黃剛應城三條胡同曰南陵太平五條  
胡同曰寶慶仙裕黃梅六條胡同曰孝感七條胡同  
曰南安袁州惠州八條胡同曰辰沅漢陽九條胡同  
曰蘄州十條胡同曰上湖南湘潭長郡新開路曰常  
山岫沃安陸南蘆草園曰京江蓆兒胡同曰石埭德  
化廬陵大蔣家胡同曰貴州旌德雲間吉安小蔣家  
胡同曰陽平晉翼旌德永嘉胡同曰漳州東猪市大

街曰南康三里河大街曰淮安薛家灣曰鄞縣閔王  
廟前街曰宜黃雲夢石虎胡同曰嚴陵半壁街曰金  
華東小市曰慈谿崇文大街曰山東廣渠門內爐聖  
菴曰潞安<sub>補</sub>水窖胡同曰平鎮


宸垣識畧卷九



外城西北

卷十







宸垣識畧卷十

仁和吳長元太初氏輯

外城

西

西月牆在西洞子門外至正陽橋形與東月牆同其傍  
城夾道曰帽兒棚

大街西邊市房後有裡街曰珠寶市曰糧食店南至豬  
市口又西半里許有裡街曰煤市橋曰煤市街南至  
西猪市口其橫胡同曰西河沿曰大柵闌曰大齊家  
胡同曰小齊家胡同曰王皮胡同曰蔡家胡同曰施

家胡同曰掌扇胡同曰雲居寺胡同曰潔井胡同曰乾井胡同在煤市橋者東曰廊房頭條胡同二條胡同三條胡同西曰火扇胡同曰苕帚胡同曰炭兒胡同曰楊梅竹斜街在煤市街者西曰李紗帽胡同曰栢興胡同曰小馬神廟曰大馬神廟其東卽齊家諸胡同大柵闌西南斜出虎房橋大街內觀音寺前分櫻桃李鐵鍋二街復并于五道廟此皆市廛旅店商販優伶叢集之所較東城則繁華矣

萬壽關帝廟在西河沿係舊刹本朝爲中北二城分

界處

地藏菴在西河沿排子胡同有康熙二十年鼎一

七聖祠俗名蝎子廟在火扇胡同

大弘廟在三眼井係舊址康熙三十六年僧明泐重建  
有大學士張玉書碑

延壽寺在西河沿五斗齋西南地名延壽寺街寺在遼  
金稱巨刹遼主嘗臨其地金人以棲道君及汴京所  
獲車輦悉置于寺意今琉璃廠皆昔之寺基明正統  
間太原僧湛然重建開渠得斷碑有延壽字可辨因

仍其名

松漠紀聞燕京蘭若相望大者三十有六然皆律院  
自南僧至始立四禪院曰大覺招提竹林瑞像延壽  
院主有質坊二十八所僧職有正副判錄或呼司空  
宋童貫蔡攸率師入燕號撫定勒碑于延壽寺紀功  
正乙祠在西河沿康熙五十一年建有檢討諸起新碑  
關帝廟在西河沿譽闡橋俗名粗旗杆廟明舊刹本

朝重修

湯右曾宣武門東城下曉行詩老去應官有底忙

未明先起攬衣裳人從鴉鵲聲中出路入輪蹄影  
裡長廊下已添新水勢城陰初散曉烟光隔河樓  
上花枝好尚護重金半篆香

坂子廟在櫻桃斜街

觀音寺在大柵闌西名觀音寺街前殿有明成化丙午  
年鐘一

撞頭菴在觀音寺街後胡同內今比邱尼居之庭前古  
槐一株大數圍腹空而枝葉茂蔚數百年物也

火神廟在李紗帽胡同康熙年建明留守衛地

大學士朱文安軒邸在煤市街有

世宗御書朝堂良佐額

雲居寺在煤市街東雲居寺胡同係舊刹無碑碣

馬神廟在煤市街大馬神廟胡同有明萬歷間鑿一

玉極菴在王廣福斜街有明天啟三年鼎一 本朝康

熙間有御史張世圻重修碑

中城副指揮署在西猪市大街

萬善給孤寺在西猪市大街傳創自唐貞觀間 本朝

重修有順治十六年給事中史彪古康熙三年御史

方吉午二碑

施閏章給孤寺同季天紳作古寺陰陰五月京郊  
壇松色上衣裳雲依初地從侵檻雨過高城各盡  
觴消渴茂陵甘寂寞棲遲金馬散清狂飄蓬聚散  
同爲客何處人間是醉鄉

大學士李文貞光地邸在西猪市大街有

聖祖御書夾輔高風額

準提菴在石頭胡同

萬佛寺在胭脂胡同

芥子園在韓家潭康熙初年錢唐李笠翁漁寓居今爲

廣東會館

長元按笠翁芥子園在江寧省城有所刊畫譜三集行世京寓亦仍是名

五道廟在虎坊橋東北

考按五道廟旁有玉帝殿明兵部尚書新城王象乾撰記立石以斯地爲正陽宣武二門龍脈交通之地因括其意名其碑曰交龍碑

梁家園在十間房南明時都人梁氏建亭榭花木極一

時之盛地窪下有水可以泛舟後圯廢乾隆間卽其地建壽佛寺

王士禎過梁家園憶昔遊詩此地足烟水當年幾  
遡游故人皆宿草衰柳又驚秋門冷鼴鼯窓霜寒  
雁鶩愁永懷川上歎逝者竟悠悠昔與宋荔裳諸君泛舟于此

壽佛寺卽梁家園乾隆四十四年僧蓮性募建

考按春明夢餘錄云梁園在京城之西南廢城邊  
引涼水河入其中今涼水河流經南苑由張家灣  
入白河在外城之外所稱引水故道不復存矣其

曰廢城蓋遼城也

長元按梁園近章家橋水道見宣武城河按語中  
吳梅村寓居在虎房橋北魏染胡同

長元按乾隆間某京宦寓此有聯云旁人錯比揚  
雄宅異代應教庾信居手書懸于柱

孫少宰承澤故居在章家橋西名孫公園

朱彝尊集孫侍郎研山齋詩勝序愁初豁高齋近  
許過圖書留客少花藥閉門多興每耽邱壑衣從  
挂薜蘿千秋論述作出處本同科

興勝寺在十間房有明天啟二年銅鐘一本朝康熙辛巳長洲汪士竝書禪逕清閒額懸之門楣

鐵老鶴廟在十間房僅屋一間祀關帝庭前古槐一有明嘉靖甲寅劉鐸碑又萬歷庚子鑄一殿鴟吻上設鐵雀二隨風旋轉以驅鳥巢故名

琉璃廠在西河沿南楊梅竹斜街之西內有琉璃窯本朝設滿漢監督董其事燒造五色琉璃瓦廠地南北狹而東西長約二里許

燈市向在東安門今散置正陽門外及花兒市琉璃

廠猪市菜市諸處而琉璃廠爲尤盛廠前陳設雜伎  
鑼鼓聒耳遊人雜遝市肆玩好書畫時果耍真無不  
畢集自正月初四五至十六七而罷名曰光廠

勅建火神廟在琉璃廠東乾隆十年步軍統領衙門委  
官重修有兵部尚書忠勇公福隆安碑

仁威觀在琉璃廠明正統年建

王阮亭寓居在琉璃廠火神廟西夾道有藤花爲阮亭  
手植尚存

遜御史大夫李內貞墓在琉璃廠東

考按乾隆三十九年窑廠取土掘得李內貞誌石  
以古墓復封識存其舊誌云遼故銀青榮祿大夫  
檢校司空行太子左衛率府率御史上柱國隴西  
李公諱內貞字吉美瀉汭人保寧十年六月一日  
薨于盧龍私第享年八十其年八月八日葬于京  
東燕下鄉海王村

大隱菴在鐵廠北口西河沿明嘉靖間建蓋餘姚鄉祠  
也有 本朝康熙六十年重修碑

延壽菴在琉璃廠西明萬歷間重修皆內官鳩葺

永興寺在南柳巷寺門東向南行約五十步折而東有  
興仁寺南向其建置年月無攷

考按今南柳巷有永興庵門東向當卽寺之遺址  
興仁寺已廢

長元按今十間房有興勝寺疑爲興仁之訛  
北營內北西守備署在宣武門外鐵廠

海波寺在清廠迤北其地名海波寺街今廢

朱竹垞寓居在海波寺街有古藤書屋

朱彝尊自禁垣移居宣武門外詩詔許携家具書

難定客蹤誰憐春夢斷猶聽隔城鐘

北極菴在清廠祀玄帝有明萬歷間朱之蕃碑

龍王廟在清廠無碑碣可考門外有巨潭蓋古刹也

永光寺在清廠西卽元大萬壽寺也曹洞下青州辨公

居之有大萬壽寺開山傳法歷代宗師實蹟碑記文

字磨泐又明正統十一年本山住持本恩立石昭化

寺住持妙清碧潭篆額碑稱辨公居此湛然屏山二

居士爲其上首外護湛然卽耶律文正王楚材屏山

金李翰林純甫也寺有許道寧畫屏

元納新萬壽寺懷古詩皇唐開寶構歷劫抵金時  
絕妙青松障清涼白玉池長廊秋屢響高閣夜鐘  
遲獨有乘閒客扶藜讀舊碑

原按寺東清廠有巨潭易之詩所云清涼白玉池  
疑卽此

聞喜巷在趕驕市係聞喜人旅寓有康熙間重修碑  
北城吏目署在椿樹三條胡同

四川營在虎房橋路西迤北爲四川石砫女帥秦良玉  
屯兵之所因名

明莊烈帝召賜文帥秦良玉詩蜀錦征袍手製成  
桃花馬上請長纓世間不少奇男子誰肯沙場萬  
里行

中營東南一守備署在四川營內棉花一條胡同

圓通菴在棉花五條胡同今比邱尼居之乾隆間重修  
有刑部尚書汪由敦碑

天仙菴在棉花九條胡同比邱尼居之

正覺菴在西草廠胡同比邱尼居之

施愚山寓居在鐵門今宣城會館

王士禎過宣城館詩暮天黃葉落一過西州門無復高人蹟空聞宿鳥喧新阡思挂劒舊館憶開尊南望澄江水誰招屈宋魂

北城正指揮署在萊市北鐵門

○仙露寺析津志云近萊市居民掘得石函乃遼世宗天祿三年所瘞中藏舍利無有匣如石槨而短小旁刻僧志願記始知此地卽仙露寺遺址地名千人邑比邱尼皆曰邑頭陀記後有千人邑三字具列大遼皇帝皇后東明王夫人永寧大王燕國大王名

○元趙栗夫舊居在菜市街西今無考

元陳一夔贈趙栗夫詩菜市街西新卜居豆棚花  
蔓共蕭疏胸中富有書千卷誰笑家無擔石儲

南營遊擊署駐菜市口西

廣慧寺在宣武門外司家坑明嘉靖中太監劉成朱仲  
重修有余一鵬碑

玉虛觀在罐兒胡同有明胡濱李錦二碑其舊志金元  
碑無考

金有玉虛觀元有玉虛宮今之玉虛觀未審卽其遺

址否元一統志元玉虛觀在舊城仙露坊南有金戶  
部主事雲騎尉龐鑄二碑元叅知政事楊果碑

接待寺在祚子橋有明正德二年刑部尚書閔珪碑

松筠禪林在祚子橋明楊椒山先生故寓卽以祀焉

本朝乾隆四十九年重修

尤侗謁楊椒山祠詩諫草留遺石年年化碧痕悲  
風吹古木大鳥叫祠門青史平生事丹楹故國恩  
永陵北望在流涕向黃昏

朝慶禪林在椒山祠對門

三忠祠在上斜街明天啟四年敕建以祀沁水張忠烈  
公銓襄陵高忠節公邦佐大同何忠愍公廷櫆三公  
皆山西人故額曰山右三忠祠三忠皆死于遼東王  
事左附祀明二十人右附祀 本朝六十四人

順城門西河年例初伏洗象導以紅棍鳴鼓下鳴鑼起  
有官以隸其事兩岸觀者如堵

王士禎洗象行水闢蒼蒼柳陰碧寶馬流蘇分絡  
繹日中傳呼洗象來玉河波射珊瑚赤須臾鉦鼓  
千雲霄萬夫聲寂如秋宵虎毛蠻奴踞象頂邱山

不動何岩堯岸邊突兀二十四直下波濤若崩墜  
縱橫欲蹴鼉鼉宅騰達還成鵝鶴隊乍如昆明習  
鬥戰萬乘旌旗眼中見又如列陣昆陽城雷雨行  
天神鬼驚奴子胡旋氣道壯忽沒中流躍巨浪撤  
波一躍萬人呼幡然却出層霄上今年宰相收夜  
郎扶南盤況求王章遠隨方物貢天闕屹然立仗  
金堦旁聖朝自不貴異物致此亦足威遐荒蕪  
門鼓吹暮復動海立山移呼浩沕大秦獅子多威  
神山林豈是天家珍

明正統五年翰林侍講劉球奏天雨連綿宣武街西河決漫流與街東河會合二水汎溢淹沒民居請修築以消其患仍會官計議于城外宣武橋西量作減水河以洩城中諸水上命工部右侍郎邵叟成國公朱勇勘視晏等稱言實具修築事宜以聞復命欽天監正皇甫仲和審視作減水河利否仲和言宣武門西舊有涼水河東城河南岸亦有舊溝皆可疏濬以洩水勢上是之

原按明成化中楊尚書鼎喬侍郎毅同袁叅將右

會勘稱三里河源出彰義門外玉匠局等處馬跑  
等泉則自西而東不知從何處流入劉忠愍所云  
涼水河及城河南岸舊溝亦不辨所在海波寺久  
廢其街之南有清厭潭上有龍王堂又南東爲章  
家橋又南爲虎房橋橋西南爲潘家河沿計新城  
未築時無地無水今其故道皆不可考矣

考按宣武門外橋東今有響水澗其明時所築減  
水河故道已不可考涼水河源出鳳泉詳郊坰門  
元劉崧順承門送別詩送客出城秋已涼太行南

上楚天長順承門外斜陽裡  
蕎麥花開似故鄉  
○李將軍園在西城其遺址無考

徐乾學飲李將軍園詩宣武門西別業幽羣公載  
酒共銷憂石迴鸚鵡依雕檻泉噴珠璣入畫樓倚  
樹詩成欣暇日看山人醉坐深秋六龍正向榆關  
度留得陽和遍九州

○同園在西城今無考

查慎行上已後五日同園看花詩結鄰真喜近斜  
街步屐尋春又一回五日重來光景換早花零落

晚花開 山桃含笑海棠妍素柰香清亦可憐  
小雨乍晴晴又雨今年天是養花天

長椿寺在土地廟斜街明慈孝皇后建以居水齋禪師  
其大弟子爲神宗替修賜千佛衣及姑臧衣各八百  
件米麥等物動千石有二庫以二中官專貯三宮布  
施金錢有滲金多寶佛塔高一丈五尺有萬歷中工  
部郎中米萬鍾書水齋禪師傳碑 本朝乾隆二十  
一年重修有兵部尚書宋德宜碑

長椿寺大殿旁藏佛像十餘軸中二軸黃綾裝裱一

繪九朵青蓮花捧一牌題曰九蓮菩薩之位明神宗  
母李太后也一繪女像具天人姿戴毘盧帽衣紅錦  
袈裟題菩薩號下注崇禎庚辰年恭繪烈皇帝生母  
孝純劉太后二圖不知何時安奉寺內今乃委積塵  
埃中

考按今祇女像戴毘羅帽一軸九蓮花一軸無並  
無字樣

明徐本高過長椿寺贈水齋上人詩涼秋新月影  
生苔古柏蒼蒼有徑開清梵數依祇樹起天花如

共妙香來三千遍界身能定七十餘年心未灰我

自朝衣淄欲染堂前童侍莫相猜

水齋號歸空明陽

毛奇齡陪益都公長椿寺飯僧詩珠林高向帝城

開臘日同登說法臺貝葉翻經龍聽去天花作供

鳥啣來深厨香積維摩饌小品籤投殷浩才誰信

經冬尋寶樹杪櫂猶是舊時裁

查嗣堦雜詠詩跨鳳前身事不虛九蓮經授夢初

回龍章鳳額招提遍不及慈寧聖母書

北營叅將署在宣武門外斜街

趙吉士寓居在長椿寺西今爲全浙會館內有景賢祠  
紫藤僧舍乾隆間茗上孫人龍作祠記仁和趙佑跋  
長元按孫記云館卽趙氏寄園考爲前明冉駙馬  
月張園遺址刻今教子胡同所稱寄園豈趙氏另  
一別業耶又冉都尉月張園朱竹垞載阜成門傍  
城垣下此云卽其遺址殆傳聞之誤

都土地廟在土地廟斜街卽元之老君堂每月初三  
三二十三日有廟市

聖恩寺在斜街東廣寧門大街遼開泰間重修有大悲

閣閣後有方石甃八角塔今寺存而閣與塔俱無  
析津志凡載昊天閣忠聖安等寺俱云在舊城而此  
寺亦云舊城則今之聖恩寺當卽唐時遺址無疑

增壽寺在廣寧門大街之北明敕建碑無考 本朝乾  
隆二十一年重修有

御書額

鐵園在增壽寺夾道尚書王崇簡別業今圮

毛奇齡遊王大司馬園林詩攬勝覓佳園入門生  
隱心岩從雲外接人向洞中尋絕閣摩天豁空壇

負日陰恍疑臨塞峽騎馬度彈琴

居庸關有彈琴峽水聲如琴

複磴風前折陰崖雪後寒橋迥雙澗落石隙一

亭安翠柱遮行幔銀牀漱急湍林疎垂縷絡尚有

蔓胡蟠

西城正指揮署在廣寧門大街

大慈仁寺在斜街西廣寧門大街之北門額曰大報國慈仁寺亦稱報國寺元時二松無存毘盧閣已久圯矣本朝乾隆十九年發帑重修有

御書聯額及詩碑寺有密變觀音像相好莊嚴有

御製記并詩每月逢五六日有廟市

燕都遊覽志大慈仁寺殿前二松相傳元時舊植臺  
右一株尤奇寺後毘盧閣甚高望盧溝橋行騎歷歷  
可數閣下甃觀音像高可尺餘寶冠綠帔手捧一梵  
字輪相好美異僧云得之窯變非人工也

慈仁寺本爲周太后弟吉祥建而寺有成化二年御  
製碑止云爲太后祝釐不及吉祥蓋當時尚諱言其  
事唐應德詩云同行更說前朝事繡蟒銀魚有故僧  
至歸熙甫作記始詳言之寺建于故報國寺山門之

東都人至今目爲報國寺然實非報國寺舊址也

慈仁寺亦呼報國寺蓋先有報國寺在寺之西北隅  
今僧院中尚有遼乾統三年尊勝陀羅尼石幢

考按今報國寺西北隅有寺無額土人呼爲小報  
國寺遼幢無考

施閏章慈仁寺松詩直欲凌風去翻從拂地看摧  
殘經百折偃仰鬱千盤老閱山河變陰兼日月寒  
支離爾何意不厭卧長安

尤侗清明日登毘盧閣詩滿城土雨踏青難梵閣

峩峩一倚闌北闕雲開燕市近西山日落漢陵寒  
蒼松骨老龍鱗動綠柳腰低燕語殘斗酒雙柑休  
惜醉春風不易到長安

高珩九日獨登報國寺閣詩野色橫今古西風滿  
帝州山寒雲外出水遠日邊流萬象秋皆靜浮生  
倦亦休長松幽意愴少爲夕陽留

○槐樓在報國寺左武清侯李偉別業今無考

廣德寺在宣北坊慈仁寺之左殿階東有匡山釋宗材  
碑文稱寺係古刹明正德間重修嘉靖六年太監金

尤等塑香花菩薩于殿中今鐘鼓樓皆圯矣

善果寺在宣武門外西南二里白紙坊舊名唐安寺創于南梁明天順間復建有修撰嚴安理太常卿張天瑞禮部尚書周洪謨光祿少卿李紳四碑 本朝順治十七年

世祖章皇帝臨幸其地有康熙十一年大學士馮溥碑  
考按善果寺在廣寧門大街北巷內

馮溥九日登善果寺毘盧閣詩寶閣峻嶒俯帝京芙蓉西望剏初成龍窺方丈三更雨天假重陽

一日晴入眼黃花矜晚節舉頭鴻雁惜歸程茱萸  
剩有仙人佩池草何緣寄遠情

歸義寺在善果寺西遼刹也天王殿前一碑無撰書人  
姓氏額題彌陀邑特建起院碑文稱寺肇自清寧七年  
買徐員外地遂爲歸義寺

考按善果寺西半里有菜圃遼碑在焉倚晴閣雜  
抄謂其地卽歸義寺以碑考之似別爲一寺而歸  
義寺乃在其北買徐員外地云殆誤讀耳

歸義寺在舊城時和坊內有大唐再修歸義寺碑幽

州節度掌書記榮祿大夫檢校太子洗馬兼侍御史  
上柱國張冉撰畧曰歸義金刹肇自天寶迫以安氏  
亂常金陵史氏歸順特詔封歸義郡王兼總幽燕節  
制始置此寺詔以歸義爲額大中十年庚子九月立  
石

考按歸義寺朱彝尊所引諸書俱以爲遼刹考析  
津志則寺實建于唐遼時石幢久淪土中 本朝  
乾隆十九年土人于菜圃掘得之記二篇今置善  
果寺內

查慎行歸義寺詩地作隣人業苦侵破廟堧兩三  
碑背字猶記會同年

○紫金寺在宣武門外迤西寺門西向有明嘉靖三十  
二年尚寶卿李坼碑謂寺始建于宋云

考按紫金寺已廢其遺址在善果寺東南百餘步  
明李坼碑今移在西便門大街華藏菴門外橫卧  
道左離故處里許矣

○晚翠閣顧俠君寓居近西便門

查慎行顧庶常招飲晚翠閣詩萬卷書多揷架仍

肯教輕棄短檠燈簾前涼以三更雨屋裡清于六  
月冰朝爽不名名晚翠闇官何似似高僧依稀宣  
北坊西角鴻爪留泥我亦曾

西城吏目署在西便門內

西便門在外城之西北隅

華藏庵在西便門大街

○一莖菴在西便門內 本朝龔尚書芝麓別業所改

內有妙光閣香林亭

湯右曾過妙光閣詩披蘚香門入穿雲小閣登松

間耿殘照天外刷秋膚勝節清游數流年百感增

西風重九日吹灑酒三升

○遼大昊天寺故基在西便門大街之西今已廢爲農圃有寶塔無考惟井泉尚存

昊天寺遼刹也碑記無一存者訪之惟萬歷間山陰朱敬循一碑其建置本末俱不詳塔址已爲居民所侵寺門一井泉特清冽不下天壇夾道水也

遼道宗喜作字秦越大長公主捨棠陰坊第爲大昊天寺帝爲書碑及額在燕京舊城

元王惲登昊天寺寶嚴塔詩高標直上跨蒼穹物  
外方知象教雄九陌市聲開曉色兩都喬木動秋  
風遙憐漢馬屯湘渚安得長書附塞鴻寂歷村墟  
野烟外誰家簾幙夕陽紅

王士禛柬陳藹公于昊天寺詩重來依老衲蘭若  
倚西城白日一何速青山無世情冢中王輔嗣林  
下古先生好共蟬連語寧論世上名寺旁多古  
冢故戲及

朱竹垞寓居在槐市斜街

朱彝尊移居槐市斜街詩莎衫桐帽海櫻鞋隨分

琴書占小齋老去逢春心倍惜爲貪花市住斜街  
屠門菜市費羸驂地僻長稀過客談一事新來  
差勝舊昊天寺近井泉甘

槐簃查初白寓居在槐市斜街

查慎行十月望後周桐野王樓村過槐簃看菊留  
小飲詩老瓦盆中花十本上槐街裏屋三間眼前  
此景殊不俗輦下幾人能愛閒我已掀泥除蘚徑  
客方冒雨叩柴關寒林瘦竹蕭蕭意着片疎籬卽

故山

○婆娑亭飲山亭在彰義門內元馬文友別墅今無考  
廣寧門在外城之西元名彰義門

寶應寺在廣寧門東南地名南燕角相傳唐刹也有明  
萬歷中編修顧秉謙碑又萬歷三十二年鐘一旁有  
明司禮監王安墓

峩峩禪林在老君地康熙初年建

○燕角樓在府西南十五里遼建今其地猶名燕角

考按遼燕角樓今無考惟土地廟之西其地猶有  
燕角兒之名閣讀如藁更考明張爵五城坊巷胡

同集于白紙坊亦載有燕角兒正在廣寧門右安  
門內西南角是明一統志所載正指其地况遼時  
城址其半在今外城之西則今燕角之地適當其  
東遼時樓址或卽在是

白紙坊南城諸坊白紙坊最大元于此設稅副使北自  
善果寺南至萬壽宮西極天寧寺皆是也自嘉靖築  
新城以城牆界之坊劃而爲兩矣今居民猶以造紙  
爲業

千佛寺在棗林街明嘉靖間重建有明碑一

崇效寺在白紙坊有明夏子開區大相二碑謂寺建于唐貞觀元年者祇據舊碑其所載他書不可考也嘉靖中太監李朗于寺中建藏經閣尚存

至士禎過崇效寺訪雪塢法師看棗花詩祇園棗花時招携共游散彷彿旃檀林吹香綠陰滿射覆叱來來樂府歌纂纂樂此淡忘歸林中夕陽緩

王謝居東日頗愛支道林亦有雁門僧宗雷並招尋我來空寂舍一契山水心復有二三子清言滌煩襟遞捉玉麈柄流憇青松陰何必嶼縣遊而憶

廬山岑

朱彝尊崇效寺詩  
繚垣途轉曲入寺  
淖初乾尚有殘僧在  
同尋斷碣看白花  
秋細細紅棗曉攢攢  
更上荒臺望遙山五髻盤

曇花寺在崇效寺西北明建

聖壽寺在崇效寺後相傳唐刹無碑碣可考

古林院在白紙坊祀關帝前有戲臺蓋里社祠也有明

萬歷二十年鐘一

火藥局在白紙坊西南

右安門在外城南之西

南營西南二守備署駐右安門牛街

禮拜寺在牛街回人所居內碑碣皆回部書

聖安寺在牛街東聖安寺街金時所建明正統中賜名

普濟 本朝乾隆四十一年發帑重修額曰勅重建

古刹聖安寺內殿額皆

御書舊有三世佛像三尊今移 靜明園供奉又旃檀

銅佛像一尊今移于 寧壽宮供奉其他像皆重塑

莊嚴完好寺東廊有碑二其一前刻旃檀佛像有諸

表臣記後刻達摩像有李言贊其一前刻觀音像後  
刻關帝像俱勒萬歷己丑八月字明僧慶德碑無考  
惟張壽朋碑尚存寺有古松二株俱百餘年物獨兩  
楸樹則無之金元碑俱無考

聖安寺有金世宗章宗二朝像朱竹垞云考宋顯夫  
城南俚歌有停驛惆悵聖安寺後堂空祀李宸妃則  
寺所留像不獨二帝矣

聖安寺地名東湖柳村中有佛像三諸天像四以藤  
爲胎泥金裝飾瑣珞甲冑俱嵌珊瑚青金諸寶石莊

嚴精好寺僧云明崇禎時大內賜出

宋犖夏日柳湖僧舍詩向夕微風起遙天片月斜  
禪宮添閴寂 帝里得烟霞小院搖清碧長楸落  
晚花西山還對我空翠浩無涯

寄園在菜市西南教子胡同康熙中戶科給事中趙吉  
士別業今存老屋數間樹木甚古

查慎行九日遊趙恒夫寄園詩榮成曲磴疊成岡  
高着樓臺短着牆花氣清如初過雨樹陰濃愛未  
經霜熟遊不受園丁拒放眼從驚客路長亦有東

離歸不得四年京洛共重陽

沈德潛移居寄園詩屋角時聞噪晚鴉土牆一帶  
任周遮行人欲認詩人寓老樹邨邊第二家 茗  
垣舊剝玲瓏句土室新安曲盃牀莫話寄園全盛  
事酒旗歌扇已滄涼

○竹林寺遼道宗八年楚國大長公主捨私第爲寺賜  
額竹林又曰金熙宗駟馬宮也寺僧云一塔無影

考按竹林寺明景泰中重建易名法林在筆管胡同今廢爲菜圃有天順間翰林學士呂原碑其塔

已無可考

永慶寺在教子胡同今尚存殊隘陋有鐘一上鑄萬歷  
壬寅五月字

憫忠寺在菜市西南爛麪胡同之西唐貞觀十九年建  
東西有兩塔高可十丈是安祿山史思明所建明正  
統中改名景福 本朝雍正九年發帑重修

賜額曰法源寺有

世宗御書聯額又御製法源寺碑內閣學士禮部侍郎  
勵宗萬奉 敕書乾隆間有

皇上御書心經碑四十三年重修

唐太宗憫東征寺卒戰亡收其遺骸葬幽州城西十  
餘里爲哀忠墓又于幽州城內建憫忠寺中有閣諺  
曰憫忠高閣去天一握

考按唐時幽州鎮城遺址在今外城之西及廣寧  
門外地故寺在其東采師倫書重藏舍利記稱寺  
在於城東門內百餘步又景福元年碑亦云大燕  
城內地東南隅有憫忠寺門臨康衢可互證也今  
則在外城之西隅矣廊下石刻及磚塔俱無考

蘇靈芝書寶塔頌今在憫忠寺

是碑陷文甚多  
朱竹垞有案

采師倫正書重藏舍利記在京師憫忠寺碑建于唐會昌六年九月此初復佛寺之文也

考按累朝遺碣如唐蘇靈芝書寶塔頌景福元年重藏舍利記及遼大安間觀音地宮舍利函記金大定間禮部題名記諸碑皆足以資考證

元張翥登憫忠閣詩百級危梯遡碧空憑闌浩浩納長風金銀宮闕諸天上錦繡山川一氣中事往前朝僧自老魂來滄海鬼猶雄只憐春色城南苑

寂寞餘花落舊紅

王士禎九日獨游憫忠寺詩閒居愛重九獨往果  
幽尋初地凭高閣諸天落梵音雁王投極浦鹿女  
蹋空林玉輦經行地青松馳道深

魏之秀游憫忠寺詩琳宮深邃栢蒼蒼鐵佛臺因  
古國鴉妙法有源達寺係律門聖世孤忠堪憫惜唐皇老  
僧戒約溫而厲游客詩情慨以慷莫向殘碑  
說安史景山鼙鼓更淒涼

朱謝枋得被魏天祐強赴燕京問謝太后攢所及瀛

國公所在再拜慟哭已而卧病遷憫忠寺見壁間曹  
娥碑泣曰小女子猶爾吾黨不汝若哉不食而死明  
景泰中謚曰文節

明袁繼咸燕都弔謝疊山詩北風塵起征車促南  
火傷心不再嘘三敗猶還仲母在兩旬忍餓漢臣  
如歸降當日原無表却聘留今只有書天使先生  
沈卜市建陽橋亦首陽居

明御史趙譏祠在憫忠寺西崇禎甲申殉難墓在祠後  
乾隆間謚忠愍

○尉使君寺北魏元象元年幽州刺史尉長命造後改爲智泉寺唐則天時改爲大雲寺開元中改龍興寺在憫忠寺前隋造塔藏舍利處

考按元一統志唐大中時節度使張信伸奏立精舍并東西浮圖曰殊勝曰永昌賜額延壽遼保寧中建殿九間窮極偉麗金海陵天德三年爲宮世宗大定二十一年命有司別錫地重建今無考

○綿山寺在憫忠閣西

靈虛觀在憫忠寺前蝦蟆岸內有古槐今俱無考

白馬寺在宣南坊憫忠寺南地名添官保隋刹也殿後尊勝陀羅尼幢上刻仁壽四年正月上旬造明洪熙間重建有翰林學士張元楨工部尚書張文憲二碑其東有僧塔塔前有古碑已爲侵占者所毀矣今寺已圯其地名白馬寺坑明碑尚存

朱彝尊白馬寺詩仁壽千年寺今存半畝宮落鐘橫道北瓦塔限墻東客至愁鳴犬僧寒似蟄蟲夕陽留未去雙樹鳥呼風

火神廟在白馬坑西明宣德四年建元火燄營舊址也

有明碑二 本朝乾隆間重修有編修茅元銘碑

○靜寧寺在都城之南圮已久明天順間內監潘英爲之重建賜額崇福有翰林學士商輅碑又播陽釋道源碑今已圯廢土人尚目之曰新寺

原按萬歷初孝定皇太后營造愈衆而一經修建寺額輒更如憫忠靜寧相去甚邇同更曰崇福後人之考證實難

○宏仁萬壽宮明萬歷四十三年勅建中爲文昌殿左以祀諸葛孔明封號曰夫樞上相右以祀文信國封

號曰天樞左相皆目之曰真君祀雷神于後殿設禮  
斗臺最後建高閣十三楹曰太極造運寶閣以安昊  
天上帝有神宗御製碑

考按宏仁萬壽宮在益兒胡同之西遺址僅存無  
寸椽矣土人猶呼爲萬壽東宮因其西百餘步尚  
有萬壽西宮也文昌像及諸葛孔明等像俱移于  
益兒胡同玉皇廟內

徐乾學玉皇閣詩崇臺臨廣陌列館俯平臯片水  
寒烟積千峯秋靄高苑牆獵騎過津樹野鴟號落

葉紫仙竈殘霞胥客袍蒼然收塊莽靜若遠城壕  
旅鬢繁霜換流年逝水滔得閒頻載酒乘興卽揮  
毫公子江蘿佩佳人金錯刀書鞍殊未已臘屐不  
言勞莫忘城南飲今朝意氣豪

萬壽西宮在益兒胡同西明萬歷間建今尚完整有關  
帝殿呂祖殿其後斗姥閣三層高四五丈亦有神宗  
御製碑

長元按廟額書關帝廟神宗御製碑係封關聖爲  
翊天大帝其萬壽西宮之稱乃土人因在萬壽宮

西而名之耳

○城南道院在望遠村東去陶然亭二里

查慎行移寓城南道院納涼詩不信人間有鬱蒸  
好風來處晚涼增滿城鐘磬初生月隔水簾櫳漸  
吐燈書少只宜高閣皮牆低聊當曲闌憑白鬢道  
士休相避我已身如退院僧

○樵沙道院在城南查慎行詩云樵沙古道院風氣清  
瀏瀏入門樹千霄檜柏榆槐楸蓋古刹也今無考

玉皇廟在益兒胡同明萬歷中建有光祿少卿史紀事

碑 本朝順治十四年重修

世祖章皇帝臨幸其地有大學士金之後碑

蓮花寺在七井胡同

永月禪院在爛麵胡同建置年月無考有順治十六年

西洛王無咎書額

京師二月潤溝穢氣觸人南城爛麵胡同尤甚深處各二丈開時不通車馬此地在憫忠寺東唐碑稱寺在燕城東南隅疑爲幽州節度使城之故濠也

考按爛麵胡同在宣南坊所稱唐碑即憫忠寺條

下所載景福元年重藏舍利碑也唐幽州節度使  
城其址半在今外城之西則城濠故址或當在此  
○怡園在橫街西七間樓康熙中大學士王熙別業中  
有額曰席寵堂曰耆年碩德曰曲江風度皆  
聖祖御賜今亭館已圯其地析爲民居矣

毛奇齡怡園詩山莊清沐駐驂驛曲徑通街出巷  
南纔到射堂門啟處門紗映出一山藍 青溪百  
折洑流低不見桃花路已迷欲向岩前尋舊迹漁  
舟尚在洞門西 赤闌斜度暗杉關樹底吹笙鶴

自還行過摘星岩畔望紅亭高出碧雲間 小雨  
初過景倍清山堂設饌午烟晴綠腰唱罷彈俱歇  
滿耳惟聞流水聲 草花續樹晚猶生石棧連雲  
斷復行怪道午橋風景別一花一石手經營 平  
門近市垣修廊西北高樓傍粉牆桂檻下臨光德  
里柳絲低拂永豐坊

長元按七間樓在橫街南半截胡同口卽怡園也  
相傳爲嚴分宜別墅其北半截胡同有聽雨樓則  
東樓別業今歸查氏又王氏青箱堂在米市胡同

關帝廟北今歸胡大司寇其宗祠在繩匠胡同已  
析爲民居惟王氏宗祠四字磚刻尚存

查慎行集聽雨樓詩白髮春垂暮紛紛日校書忽  
聞傳尺牘招我過園廬簾引新雛燕牀拋舊佩魚  
此中饒勝賞大可賦閒居

大學士陳文簡元龍邸在繩匠胡同北有

聖祖御書愛日堂額西有闢亭通北半截胡同

關帝廟在米市胡同南明天啟乙丑年內官建有大學  
士顧秉謙碑又本朝康熙間鼎鑪一寺僧云

聖祖嘗幸其地故廟中門不開

會同四譯館在橫街中

華嚴菴在四譯館東係舊刹無考

千佛寺在橫街中

張相公廟在延旺廟街舊係關帝廟 本朝康熙二十二年蕭山紳士重建祀文武二帝暨宋封浙江潮神  
靖江王張公有少詹事周之麟碑

保安寺在米市胡同東保安寺街明正統年賜額有募  
靖間右通政郭秉聰 本朝乾隆間釋通理二碑

玉皇廟在保安寺東明崇禎二年建

元帝廟在驃馬市明建今爲收稅局前宇祀馬神有

本朝順治間大學士王熙禮部尚書劉廷玉二碑門  
外東西半里許每日黎明貨賣舊物名西小市

晉陽菴在潘家河沿南口內有銅觀世音像高三尺餘  
下有欵識云大唐貞觀十四年尉遲敬德造黎秘書  
民表隸書古佛菴三字極工後像移置稽山會館

考按古佛菴在受水塘像自晉陽菴移彼復移稽  
山會館在虎坊橋東今浙紹鄉祠也旁有眼藥菴

供銅大士一尊并善才龍女銅質甚古潤並無尉  
遲敬德欵識或係後人更換或本屬相沿附會之  
說朱原書未考

崇興寺在粉坊街北口崇興寺胡同明天順四年勅建  
有成化二十年碑二今比邱尼居之

響鼓廟在崇興寺南亦古刹也踞高阜前後神宇各三  
楹有萬歷間碑一

黑窯廠爲明代製造甌瓦之地 本朝均交窯戶備辦  
此廠遂廢其地坡壠高下蒲蒼參差都人士登眺往

往而集焉

長元按今廢窯上建真武殿三楹翼以小屋道人  
居之路口有靈官閣坡徑紆廻盤折而上可以眺  
遠名曰窯臺夏間搭涼篷設茶具重陽後葦花搖  
白一望彌漫可稱秋雪亦城南一勝地也

沈德潛九日同人黑窯廠登高詩崇岡突兀俯南  
城木落寒林眼倍明雙闕參差佳氣合三關層疊  
暮雲橫風霜慘澹重陽節燕趙悲歌終古情況有  
酒人同會合一杯便欲酌荆卿

龍泉寺在黑窑廠西不知創于何時有明謝一夔碑載成化間僧智林修復爲淄流掛錫之地本朝康熙間僧海鑾重修

太清觀在龍泉寺南地名珠營明萬歷間建無碑今圯廢惟山門尚在羽士居之

慈悲庵在黑窑廠南近城垣西偏爲陶然亭北院內有遼壽昌五年慈智大德師佛頂尊勝大悲陀羅尼幢并記又庭前有金天會九年四月石幢四面各鏤佛像其三隅刻梵文皆西域梵書而標以漢字曰淨心

法界陀羅尼觀音菩薩甘露陀羅尼智炬如來心破  
地獄陀羅尼惟一隅漫漶僅辨年月則招提勝境由  
來舊矣

陶然亭康熙乙亥江郎中濤所建取白居易詩更待  
菊黃家釀熟與君一醉一陶然今士大夫恒于此謙  
集焉

湯右曾秋日登大悲庵後亭詩石幢重到訪遺經  
秋色蒼然落此亭鴻雁影低連古堞蒹葭聲冷繞  
迴汀如絲氣上龍泓白滿月光搖佛髻青願證諸

天菩薩戒自今刀几謝羶腥

杭世駿詩溪風吹面盛晴濶葦路蕭蕭鴨滿灘六  
月陶然亭子上葛衣先借早秋寒

○刺梅園在南城近黑龍潭今無考

曹貞吉游黑龍潭還過刺梅園詩刺梅花未發有  
約故人來落葉紛如夢松風對舉杯城陰春似水  
石磴雨生苔三徑遙相待蓬門盡日開

○封氏園在南城有古松相傳金源時物今無考

查慎行過封氏園飲矮松下詩刺麌花外矮松前

指點遊踪廿四年枝亞平行妨翠鬢杖端摩頂透  
青天與誰作伴人先老閱世如流我獨憐賣却朝  
衫充一醉免教歸欠酒家錢

長元按同園刺梅園疑卽李將軍封氏二園俟考  
黑龍潭在先農壇西偏有龍王亭亦爲祈禱雨澤之所  
乾隆三十六年命工鳩治修飾整潔

京師有三黑龍潭一在城西畫眉山一在房山縣一  
在南城黑窯廠其潭一方池爾水涸時中有一井以  
石甃

施閏章九日同人集黑龍潭以偶病未赴詩長安  
雲物易爲秋九日羣登傍浦樓雷雨此中生絕壑  
蒹葭何處有孤舟西山倒影當尊酒大漠悲風試  
客裘誰信少文懷五嶽良時偏卧不同遊

徐乾學集黑龍潭詩城南仙館問幽踪陶穴人家  
路幾重古堞寒雲連絕塞高壇深樹祀先農絳霄  
九奏看翔鶴碧甃千年起蟄龍宴坐繩牀無一事  
洞門餘靄落青松

○祝家園在先農壇西左都御史祝氏別業今無考

王士禎同人招集祝氏園詩黃門休沐暇池館愜  
招尋人語碧苔徑鶴鳴修竹林微風交落絮流水  
澹春陰坐愛儻魚樂悠然濠上心

趙作舟同人集祝園詩誰憐濠濮意酒罷獨登樓  
藻動知魚樂花飛入客愁無心同止水何地不虛  
舟芳草美人暮驚風吹未休

毛奇齡姬曼殊詩堦草銜虛檻亭榴接斷垣酒闌  
携錦瑟請唱祝家園西河注云梁尚書清標有祝家園桂枝香詞姬最爱歌之  
都城隍廟在橫街之東先農壇西北本朝康熙年建

內塑城隍行宮每歲清明中元十月朔日都人迎賽  
祀孤

東嶽廟在都城隍廟東 本朝建有順治丙申內翰林  
劉澤芳乾隆丁酉編修曹學閔二碑

○野鳧潭在祈穀壇西北積水十餘頃四時不竭每旦  
有野鳧游泳其間因名之

查慎行詩潭潭積潦浸城隈不長菰蒲長水浩我  
夢江湖歸未得野鳧何事却飛來

○南園在虎坊橋南爲崑山徐司寇乾學別業今遺址

無考

徐乾學奉邀說巖先生同姜朱二翰林虎坊別墅  
宴集詩半歲苦淹病病起乍行藥眷焉思所欽蹤  
跡久寥澗市南虎坊園幽居帶林薄雅堪延野色  
憑眺有菌閣相期展塵事竟日共盤礴巾車方及  
門高駕俄趾錯青絲挈春釀促坐成小酌極望郊  
壇樹微風韵遙鐸驚沙白皚皚流靄靄青漠漠人生  
俯仰間適志原無著伊予經宿疴盤辟類繁縛翼  
大不能運如彼雕陵鵠託契惟沉冥縈懷但邱壑

稷禹佐明時巢許欣有託己能齊鵬鸞詎復岐龍  
夔粲粲渡澤公開濟負偉畧枯枝廢雕鏤不材終  
瓠落潛見理則殊奚煩更咨度何爲王僧孺只解  
京華樂吳歛讓邊筑尊羹比羊酪二君聽我言益  
落大嘔噱幸得張東門無爲詠揚藿

萬明寺在虎坊橋東南香廠爲元水浙庵遺址 本朝  
康熙間重建殿宇壯麗稱巨刹焉

眼藥菴卽浙紹鄉祠之旁室明時稱稽山會館在虎坊  
橋東菴內古銅大士像傳是晉陽庵移置者

仁壽寺在先農壇北顯德廟遺址也明萬曆元年伏牛山行者真玉卓錫于此內官張朝因宮女陳秋香聞之仁聖太后遂捐貲屬司禮監馮保建寺有李廷機劉效祖二碑今無存本朝乾隆間士民重修殿宇甚完整

靈佑宮在先農壇北仁壽寺之東舊爲十方道院明萬曆癸丑司禮監魏學顏闢地數十畝建閣一爲殿五請于朝賜護國靈佑宮有大學士葉向高碑本朝乾隆間重修

天仙廟在靈佑宮西本宮內旁殿今爲他羽士居之  
施閏章天仙宮尋徐善長詩城東仙觀遠白日到  
人稀移病從開卷官閒肯息機青蘿深石壁高樹  
隱郊扉却許論詩客淹留坐不歸

中城正指揮署在鶴兒胡同

斗姥宮在天橋西康熙年建有

聖祖御書普慈延壽閣二額三十四年翰林侍講學士  
高士奇碑四十四年翰林侍讀學士查昇碑今士民  
重修甚完整

真武廟在斗姥宮東建于明代 本朝康熙間重修有

翰林編修左敬祖碑

先農壇一名山川壇在正陽門外西南永定門之西與天壇相對繚以垣牆周回六里中有天神壇地祇壇太歲壇先農壇耤田俱在其內

先農壇制方南向一成方四丈七尺高四尺五寸四出陛各八級東南爲瘞坎壇北爲殿五間以藏 神牌東 神庫西 神厨各五間左右井亭各一東南爲觀耕臺方廣五丈高五尺面銑金磚四圍黃綠琉璃南

東西三出陛各八級繞以石闌柱前爲藉田後爲具服殿五間南向三出陛南九級東西各七級東北爲神倉中廩制圓前爲收穀亭左右倉十有二間後爲祭器庫繚以周垣南門一每歲

親耕有 御製三十六禾詞被樂人歌之

徐本 聖主躬耕藉田恭紀旭日旌旗輦路分肇  
開東作邁思文燃蕭默祝千村雨秉黛深鋤一片  
雲柳漸鳴鳩春意滿杏初飛燕午風薰袞衣成禮  
臨黃幄次第公卿致力勤 鳳城環繞綠疇多羣

仰躬耕駐玉珂兆姓盡知敦本意老農齊唱得  
年歌兩岐定見舒新麥同穎欣看長瑞禾 帝德  
天心相契合豐登寰宇共誠和

張洎 聖主躬耕藉田恭紀蒼龍勤夙駕元鳥協  
春聲土潤蒲芽淺香霏杏樹晴枝燈融絳蠟貝闕  
吼華鯨下界祥光動東方曉氣清風雷爭啟蟄日  
月會飛旌嶽嶽青壇立畊畊綺陌橫民依先本計  
帝力率深耕仗外耰耡集星前劍佩迎落花侵  
輦道新柳拂帷城禮自三推始 躬爲百辟程子

來終御畝寅亮法天行葱犧道途熟朱紜映旭明  
扇和風翕習含澤水晶瑩樵燎看旁達禾歌取載  
賡咨諭紓 膺顧望幸愜輿情千耦田功發雙岐  
地秀呈豈惟馨添稷迄用美坻京化洽羣侯仰膏  
流品物亨隴烟翔雉羽村暖悅鶴鳴伐鼓遙村社  
吹簫小市餁佳辰過冷節比戶賜香稅洋溢呼嵩  
韻殷勤獻曝誠夏畿猶有謗堯德不容名瑞表金  
穰異鑾迴玉步鏗葩雲追蓋遠翠蜀傍輪平禁苑  
行觀刈郊宮幾奉盛靈山傳堯現好雨穠珠傾快

慰豚蹄祝潛消箕舌征苗畲由 實訓庾廩寄蒼  
生共坐春臺上欣隨木向榮

太歲殿在先農壇之東北正殿七間南向三出陛各六  
紱東西廡各十有一間前爲拜殿七間東南燎爐一  
壇內垣南北東西各三門

明初肇祀太歲禮官襍議因及陰陽家說十二時所  
直之神太祖乃定祭于山川壇之正殿而以春夏秋  
冬四月將分祀兩廡嘉靖間禮臣言太歲之神自唐  
宋以來不在祀典惟元有之祭于太史院國朝始有

定祀按說文太歲木星也一歲行一次十二辰而一周天其爲天神明矣亦宜設壇露祭

神祇壇在先農壇內垣外之東南正南三門繚以重垣東爲

天神壇制方南向一成方五丈高四尺五寸五分四出陛各九級壇北設青白石龕四鑊以雲龍各高九尺二寸五分祀雲雨風雷之神壇方二十四丈高五尺五寸墮正南三門六柱東西北各一門二柱柱及楣闔皆白石扉皆朱櫺西爲

地祇壇制方北向一成廣十丈縱六丈高四尺四出  
陛各六級壇南設青白石龕五內鏤山形者三祭

五嶽五鎮五山之祇鏤水形者二龕下四圍鑿池祭  
則貯水祭 四海四瀆之祇各高八尺二寸壇東從  
位石龕山水形各一祭 京畿名山大川之祇西從  
位石龕山水形各一祭 天下名山大川之祇各高  
七尺六寸墻方二十四丈高五尺五寸墻正北三門  
六柱東西南各一門二柱柱及楣闌皆白石扉皆朱

明嘉靖九年改定風雲雷雨神牌次序曰雲雨風雷  
上曰雲雨風雷天神也獄鎮海瀆地祇也城隍人鬼  
也焉可雜于一壇而祭之議以城隍之神歸于本廟  
于常祭外添祭一壇

壇垣東門外北爲

慶成宮南向正殿五間崇基石闌前左右三出陛各九  
級後殿五間左右配殿各三間正殿前時辰牌石亭  
一內宮牆南三門東西掖門各一外宮南中三門左  
右各一門東南鐘樓一外垣周一千三百六十八丈

東向門二南北並列南入先農壇北入太歲殿皆三  
門角門一

○旗纛廟在太歲殿之東明永樂中建神曰旗頭大將  
曰六纛大神曰五方旗神曰主宰戰船之神曰金鼓  
角銃砲之神曰弓弩飛鎗飛石之神曰陣前陣後神  
祇五猖等衆皆南向旗纛藏內府仲春遣旗手衛官  
祭于廟霜降祭于教場歲暮祭于承天門今廟廢

觀音寺在先農壇南近永定門建于明萬歷中崇禎時  
王應魁鑿井施茶今井存有編修魯元寵碑


房山詩舉  
佑聖菴在觀音寺南

西城會館之著者西河沿排子胡同曰江夏三眼井曰  
婺源延壽寺街曰潮州長元吳柴兒胡同曰鄱陽楊  
梅竹斜街曰舍和廊房三條胡同曰浮梁施家胡同  
曰青陽煤市街曰漳郡乾井胡同曰贛寧百順胡同  
曰晉太平王廣福街曰汾陽新建留守衛曰高安石  
頭胡同曰黃巖西猪市曰潞安贛寧奉天九江平定  
仁錢翼城浙紹李鐵鍋斜街曰襄陵三原延定肇慶  
外郎營曰瓊州韓家潭曰廣東櫻桃斜街曰貴州章

家橋曰渭南朝邑玉皇廟曰富平梁家園曰惜字孫  
公園曰泉郡鐵老鶴廟曰大荔蒲城麻線胡同曰郢  
中南柳巷曰建寧華州北柳巷曰南豐青廠曰廣西  
鳳翔漢中四川營曰延安四川海寧椿樹頭條胡同  
曰績溪龍谿二條胡同曰永春邵陽仇家街曰雷陽  
驃馬市曰中州三晉直隸鐵門內曰宣城順城門大  
街曰關中才盛翼城韓城歙縣直隸建昌咸長撫臨  
永濟香爐營頭條曰江山上斜街曰山右將軍教場  
頭條曰山左土地廟斜街曰全浙彰義門大街曰洪

銅河東貴州江甘儀爛麪胡同曰常昭南半截胡同  
曰元寧北半截胡同曰吳興繩匠胡同曰中州休寧  
延旺廟街曰雲南保安寺街曰豐城河間奉新羊肉  
胡同曰奉新賈家胡同曰江震潘家河沿曰齊魯橫  
街曰全浙淮安南下窪子曰鄞縣粉坊街曰延平廉  
州天津下窪子曰浦城福清東磚兒胡同曰福州牛  
血胡同曰巴陵鶴兒胡同曰平介補外郎營曰潮州

涇陽





西山圖卷十二